

高安縣志卷十三上

人物

理學  
流寓附

官績

文苑

隱逸

敦行

閨範

造化篤生地靈人傑可法可傳有典有則文行交修行  
藏一轍卓哉坤儀節勁松栢亦有名賢偶茲托跡綜述  
芳型風教羽翼志人物

理學

宋

劉恒字有常號實齋西陽人折節友善素慕西澗之高躅  
常從晦菴于崇安慶元間嚴道學之禁諸儒貶斥殆盡  
恒遊跡邱園陶冶後進及事久論定當道交薦以年耄  
力辭

元

熊鼎和號梅雪齋岡下人深明道學精窺聖理一時景從遐邇無間入國學講論太極盡發奧旨功名不繫其念諸公卿詩歌贈答咸稱為道學先生

明

謝與棟字吉甫號依中塘下人明理欲之辨無干祿之心壯遊白下與諸君子闡明性學焦漪園祝無功交相推轂崇正辛未學使陳懋德禮而迎之講學城南尊道書院士夫咸集時有庸言六則陳公序而梓之學者稱依中先生

按通志郡乘俱未標理學一門蓋難其人也舊志特表之以興起聖學之一派然而載不過二三人而已餘若三劉四傑輩寔窺理奧尚未登載因其仕籍已彰著也今百餘年來孰衍道德之真傳豈竟芳徽之莫嗣近如朱文端之著作闡明正道直入聖域然其誠意正心之學具見于經濟事業是又已行道而不必復贅也故仍其舊未有增加

宦績

晉

黃輔字萬碩有高行事親以孝聞州郡舉孝廉穆帝時仕  
至御史清直有節搢以晉政不綱權臣擅命遂棄官隱  
遁焉

按豫章書輔建城人子仁覽入仙釋

唐

幸南容有文學貞元中進士與柳子厚同年子厚送之歸  
序曰登大常之籍膺邯鄲之名此會元戎直道自達吾  
儕器其畧南聘天朝相禮述職公卿多其儀又曰比詞  
聯韻奇藻逸發爛若編貝燦若貫珠雖枚生長卿無以

尚之仕至國子祭酒封渤海郡公

幸軾南容之孫博洽強記有祖風咸通七年中三史科中

和三年為太子校書郎

鄧璠中和間自尚書江西節度使權知袁州在任興學化

民有古循吏風詔令再任僖宗時所在兵起吏無能名

獨璠有政聲焉

按省志元和間江西節度使未詳孰是

歐陽持字化基天復中進士為太學博士昭宗遷洛持知

朱全忠有異志遂遁歸西山楊行密奏除為左拾遺未

幾察行密心不在唐乃躐田不起

鍾傅少負販唐末王仙芝寇江西傅聚眾依山為堡仙芝

陷撫州而不能守傅入據之詔即以傅為刺史繼取洪

州進觀察使傅既去撫州撫民危全諷竊州以叛僖宗

擢傅江西團練使俄拜鎮南節度使檢校太保中書令

爵潁川郡王又徙南平王率兵圍之天火燒其城士民

謹驚諸將欲乘火急攻之傅曰乘人之危非仁也乃嚮

城祝火曰全諷不降非民之罪願天止火全諷聞之謝

罪聽命時州縣久廢貢舉傅歲薦士行鄉飲酒禮率官

屬臨觀資以裝齋故士樂歸之性好飲微時常射獵醉

歸夜遇虎與搏會人至斬虎然後免及既貴悔之乃畫

圖以示子孫戒之曰處事尚智謀勿效吾搏虎蹈危也

卒子匡時為留後

按鍾傅宅或在九峯或在袁州化成巖或在萬載縣西北而五代史通鑑皆載高安人今從之

宋

丁綱字文明宋太平興國二年中進士初授饒州倅刑政廉明後陞韶州知府治績尤著值歲大旱本州芙蓉峰上有火石最靈感綱虔禱輒雨是歲大稔民益感德任滿州人即以此石贖之迄今子姓亭祀焉為人恬靜寡欲薦志經典有清隱集行世

劉渙字澂之鈞山人志尚高潔精于史學天聖中進士及第為潁上令持正不阿以忤上官歸隱廬山歐陽文忠公高其節作廬山高詩以美之蔡犢為騎徜徉巖谷時

陳舜俞畫為圖有我騎牛君莫笑世間萬事從吾好之句一時傳誦蘇子由稱其冰清玉潔劉廐不撓凜乎非今世之士山谷稱其中劉外和忍窮如鐵石其所不顧萬夫不能回其首所居四壁蕭然別號西澗居士累官至屯田員外郎卒贈太子中允晦菴朱文公守南康為作壯節亭記謂其高懷勁節可以激懦律貪立祠祀之崇祀鄉賢

吳太元字一翁景祐中進士以大理評事為開封府戶曹司馬溫公薦為衛尉寺丞再薦知如臯縣陞鄆州掌書記太守富弼深器重之後出守潯州弼薦為尚書都官員外郎改漕湖北為人聰明敏捷正直和平而饒于文

落居官所在便有成績其受知二公者以此

劉恕字道原渙之子少穎悟讀書過目成誦四歲坐客有言孔子無兄弟者恕應聲曰以其兄之子妻之一座驚異十歲謁晏殊問以事往復難詰不能屈嘗從人借漢唐史閱旬還之人疑其未讀恕誦如流水十八試禮部擢第一既而殿試下第入國子監試講經復第一名動京師釋褐為鉅鹿簿發奸摘伏一時能吏自以為不及遷和川令會郡守被逮恕證其無辜忤部使者遷翁源令有能名辟廣西帥司機宜劉介廉直不避權要司馬光薦修資治通鑑遷著作佐郎王安石故善恕欲引為三司條例官力辭不習金谷之事且言新法不便或面

折之聞者縮頸亦善陳升之復以事相忤光既黜恕即乞監南康酒稅以便親養熙寧末改秘書丞贈五品服色丁母艱詔就家修書得偏廢疾猶彊書不已卒年四十七元祐間通鑑板成詔書賜其家諸儒榮之右史張耒謂其父子文學似司馬遷談而遷談無其風節似疏廣受而廣受無其文學蓋千古而一見也所著有十國紀年疑年譜通鑑外紀范祖禹黃庭堅有文表誌其墓崇祀鄉賢

張文規好學有文以年格奏名官至奉議郎勳飛騎尉贈奉直大夫蘇子由孔武仲潘興嗣何正臣皆與之遊胡直孺字少伋龍口人少辭父况都水監之蔭自力于學

以詩受知黃山谷紹聖中擢進士初授洛州戶曹雪疑  
獄入為編修解元祐黨錮之禍屢遷工部尚書以龍圖  
閣學士出知婺改洪州除知南州兼東道都總管及金  
人再至率兵七千人援戰雍邱斬首千餘明日金益兵  
至兵潰見執聞京城失守直孺大慟不已金欲立異姓  
死爭之久之得歸國欽宗撫諭之曰孤城久閉天下兵  
至者獨卿與張叔夜耳及張邦昌僭號乃嘆曰吾豈事  
偽主耶高宗即位亟赴行在所除知東平府改洪州直  
孺兩守鄉郡人以為榮奏益虔吉戍兵改刑尚書論奏  
十事以畏天愛民為首兼侍讀多所獻納上嘗書文物  
多師古朝廷幸老儒于扇頭以賜直孺後楊龜山銘其

扇曰詞潤金石忠貫日月抗節不回光輔二葉改兵部  
兼權吏部封開國伯卒贈端明殿學士所著有西山老  
人集生還錄行于世

劉義仲字壯輿恕之子也幼敏慧博洽書史平居砥礪節  
操不以纖毫污于人蘇軾過之嘆曰此家範也嘗摘歐  
陽修五代史誤作糾繆及通鑑問疑諸書司馬光以其  
父有修通鑑功乞蔭其子詔補郊社齋郎清介有父風  
懋鉅野德安簿政和間以蔡京薦召為宣教郎檢討官  
至京師絕不造謁曰吾但知天子命不知有薦我者遂  
忤京竟棄官歸隱廬山自號漫浪翁或通刺但書江南  
劉義仲又數年卒與祖父風節文學並著稱高安三劉

先生朝廷聞其太初歷甚精密就其家索之景定間邑令范擇能祠于鈞山之櫟林窩監三劉坊表焉幸元龍有記祀鄉賢

趙像之字明則紹興中進士授臨川司戶校藝廬陵得周益公楊誠齋為門生仕至軍器少監像之為詩文平淡簡遠雖持節秉麾家猶貧焉

姜克讓字仲謙潮沙人世業儒父早喪立志讀書于經史百家無所不通尤邃于易學初任憲幙搏豪強雪冤滯庶能有聲四十致仕家居篤意孝友淡然不以勢利介意邦人稱之

趙不黯字稷臣宋太祖六世孫舉進士歷官至二千石後退居錦江不磨勘者二十年孝宗以近臣交薦擢拜大宗正仕至開府儀同三司品望重一時寶慶二年入祀樂善書院

幸元龍字震甫嘉泰中進士初調湘陰簿尉京邑時万俟卨之孫與岳飛家爭田歲久不能決府委元龍裁斷積案如山元龍並不閱視即擬云岳武穆一代忠臣万俟卨助檜逆賊雖籍其家不足以謝天下尚敢與岳氏爭田乎田隸于岳卷畀于火時論韙之改知當陽縣擢通判郢州元龍銳于祛弊荆湖制置陳曠每事輒抑之時真德秀洪咨夔魏了翁等並以言濟王寃得罪元龍上書史彌遠以為濟王周之管叔也管叔挾人以叛濟王

當湖賊擁立嘗力拒之則人挾以叛叛非本心朝廷當  
治墓贈典立嗣今言者紛紛固當容之書上忤彌遠陳  
咳因希指劾令致仕紹定辛卯秋京師災彌遠私第獨  
存元龍自家上封事云天火曰災人火曰火陛下即位  
以來虛已以聽宰相若火出于天臣知宰相獲罪于天  
若火出于人臣知宰相獲罪于人且言彌遠負寧考付  
託竊陛下威福使天下知有丞相不知有天子願陛下  
戮其首以謝天下籍其家以賙天下然後斷臣之首以  
謝彌遠則災自彌矣明年卒嘗自作小傳廬陵楊伯子  
銘之曰戾戾契契生平之節毅毅頑頑千載之芳折而  
益奮踰而無悶所著有桂巖集松垣集子溥中嘉定進

士廉介有父風知鬱林

按人物志載元龍慶元進士未知孰是

幸當時元龍之弟以叅軍授光化軍司戶襄帥趙范檄往  
唐州收買軍需武守郭勝叛當時不從被殺事聞朝廷  
嘉愍贈京秩官其一子

趙崇廕字有成嘉定進士歷仕至全州通判廉介自守家  
無擔石之儲儵然自得死之日衣衾棺殮取具親友

涂應楠字仁方少力學夜分不寐登進士調臨川簿廉明  
果斷曲直立分時趙汝讜持憲節風采搖山岳特相禮  
重凡獄訟大小並委決焉舉考及格當改秩兩終

羅之紀字國張自幼穎悟超羣于經史諸子百家靡不通  
貫嘗以詩文謁楊文節公甚竒之嘉定時奏入等授孝

感縣尉攝邑雲夢持身廉謹遇事精審上官少不為禮  
因雪雁竹賦詩云吾道非耶真可恥此君豈是折腰人  
遂飄然棄官歸後再調文林郎宜山縣丞未赴而卒自  
號筠心居士所著有易傳及文集行于世

劉應龍字漢臣嘉熙中進士初授陵零簿即以廉明稱後  
平東安寇陞武岡司法改饒州錄有毛隆者務剽掠一  
夕富民被盜遙呼曰汝毛隆也盜應曰然翌日捕隆置  
獄應龍疑之曰果隆也豈肯自謂隆乎遂為之平反上  
于州州不可抵隆死未幾獲真盜應龍神明名益著歷  
知善化崇仁縣時寇至丞簿皆先遁惟應龍固守為諸  
司科院除監察御史先是理宗立福王子為皇子兵潛

時為相有異議上不悅後元兵入寇潛勸上避之及兵  
退上愈惡潛夜遺象簡授應龍使重劾之應龍心謂潛  
本賢者獨不當輕論國本及勸上遷幸耳且本朝未嘗  
輕戮大臣奏從寬典上大怒黜應龍為司農少卿遂去  
國潛竟貶死壬戌召為荆湖提舉陞直寶章閣廣東運  
使進直文華閣江西運使兼知隆興府奏免和糴二十  
萬民受其惠戊辰除戶部侍郎兼侍講同知貢舉所取  
王珏歐陽夢旗皆名士也戊辰除集英殿修撰知建寧  
府庚午除江東運使皆不赴奉祠提舉萬壽宮壬申除  
顯謨閣待制廣東經畧安撫使清海軍節度使時毛太  
子僭亂應龍急調兵討平之進封高安縣開國男食邑

三百戶癸酉為寶章閣學士出守贛州兼江南西路兵馬鈐轄甲戌陞中奉大夫除兵部尚書辭居九峰自號實齋

陳仲微字致廣善富人嘉熙進士初任莆田尉遇事必以去就爭會軍閥捕其渠戮之遂息歲飢籍閉糶誅彊糶一境肅然海寇入邑左右曰宰已遁仲微曰吾則不可乃率弓兵逐捕盜無免者以功攝邑遷海鹽丞先是有寺與學爭水利仲微按籍歸諸學一日過寺宿僧以首扣鐘仲微竊視其旁乃詛已者笑曰我何心哉于是酣寢夜未半而僧暴亡在任以廉幹聞時詔獄推徐元杰死故游侶在政府依阿不決仲微與之善因移書責之

侶不樂遂以格受崇陽宰初民讎視役仲微處之有方事治而民以勸擢倅黃州景定間幹辦行在諸司審計司差充禮部試院檢點雷同官忤監試孫附鳳出倅江州時注立信為安撫仲微與論兵立信竒之辟充安撫司叅議官會立信被劾遂罷歸復起知惠州留除監三省樞密院門遷太府寺丞兼權右侍郎屢辭不允會輪對上殿奏君子猶未盡在朝廷歷指時弊疏上忤賈似道御史張志立希指劾其謗訕請榜諸朝仲微辭官隸壬申起為廣東路提點刑獄改江東以疾辭元軍渡江仲微盡室趨嶺南且應詔上封事明年似道敗除右正言三遷侍御史復除吏部尚書兼給事中俱不拜辟地

安南卒國主以禮葬之仲微涵餼六經于諸子百家無不涉獵自號遂初門人稱為文溪先生著有文溪集

按宋史仲微嘉泰進士未詳孰是

陳應寶字真卿仲微從子幼嗜學攻苦不倦寢食俱廢嘉熙中補入太學累居優等度宗幸學恩授吉水簿以文學飾吏事聲稱一時

陳元亮字季德仲微從子博學尚氣節宋嘉熙戊戌補太學咸淳間升國錄時賈似道私人洪燾尹臨安倚勢作威元亮率諸生數百人伏闕上書歷數其奸上為黜燾元亮遂為賈所忌繇是不得志戊辰當對集英殿太學名士多倖取上第元亮獨恥之有司復希賈旨置之丙

科授慶元府教授再遷御前軍所幹辦官

胡仲雲字後甫市上人生有異質時人目為懸崖水晶年十三即淹通書史淳祐中入太學率諸生伏闕上書論罷京尹余晦蔡造為祭酒仲雲與弟仲霖師之盡朱氏之學負笈者盈館下寶祐登進士監行在倉時丁大全用事欲羅致名士授以館職不就以江萬里薦除太學正因忤賈似道出倅臨江既而家居諭止亂軍起為國子監簿攝吏部侍左嘗覆試黜賈之從子初賈欲舉為御史仲雲曰御史上親擢大臣不當先示以意論對懇切無假貸遂遷樞密院編修官攝尚書右司賈時信任翁應龍事下兩省輒以帖鈐楮尾無敢易者仲雲極論

其弊翁銜之薰崇政殿說書上言陰彊陽弱五典具廢  
忤賈黜為浙東提刑薰權紹興安撫既至減月椿錢三  
之二復追還買燈錢五萬吏贓三萬六千分諸貧民且  
令貴人毋奪民利民大悅越有僧殺人賈黨匿之仲雲  
嚴限寘于法會母憂去歲餘聞九江失守辟地海南攜  
家沂流至廬陵而卒所著有六經蠡測周易見一四書  
管窺歷代遺論宋朝政論文集三十卷江文忠為之序  
崇祀鄉賢

劉元高字仲山應龍長子生有異質牛角與胡仲雲同學  
一目十行俱下既長長身山立每與姚勉胡仲雲論天  
下事輒慷慨激烈時號高安三俊登淳祐進士初授迪

功郎彬縣簿斷事如破竹當事爭致之幕下趙葵馬光  
祖宣撫荆淮元高從事獨勞咸淳乙丑以李伯玉薦除  
知寧都縣未幾更侯官縣地多豪貴元高一繩以法復  
以洪天錫薦為御史卒天錫嘆曰又失一真御史矣元  
高善為文以理致為先繁簡必當所著有漢史意抄書  
史續抄貴華錄三劉家集山居稿行世

阮恕字伯寬寅之子以父廕宰分寧淳祐更善化陞建寧  
郡倅初赴善化時宿山間有商十數人先在馬吏與爭  
鬻恕為杖其吏且慰之吏退詎曰有官如此何以仕為  
恕亦不介意及暝商來謝曰某等竄疎感公宏量第夜  
半先起倘有小喧公但安寢恕唯唯比夜半喧甚恕戒

僕堅扃俄而寂然起燭之殺人縱橫乃強寇也是夕得  
免于難人以為寬厚之報

胡希寅號可山仲雲之子登咸淳甲戌進士授孝感縣令  
居官清廉名重一時後因世亂致仕杜門著述有經世  
要論藍橋記集卒祀鄉賢

姚雲字聖瑞宋咸淳進士初調高郵尉太守程公雅相敬  
重辟入僉知政事淮東招討使復招典司書檄後除龍  
興察推再除工刑部架閣以宋故官授承直郎撫建兩  
路儒學提舉秩滿家居求文者無虛日尤工詞調風韻  
不減秦少游一時藝苑推重疏齋盧公嘗造其廬拜焉  
有江邨遺藁行于世其子成德克紹家學為臨江教授

宣慰使歷湖州平陽兩路總管年六十六卒於官俱本

元史

吳楚字方叔性狷介博洽經史至元間以功授四會縣尹  
後更上杭建寧浦城所至以廉能稱鋤強植弱救荒禦  
寇活人數萬閩人號曰吳庶訪又曰生佛上杭有生祠  
浦城有德政碑致仕林下自稱耐翁有

文集藏于南城  
石橋崇本堂

涂謙字伯益至元間以功授本府判官累遷懷遠大將軍  
同知廣東宣慰司謙雖貴為連帥而雅淡冲約益勵操  
行投老家居自號雲溪道人黃冠楚褐日徜徉山水間  
人稱為平地神仙子濟亨克紹家學筮仕寧州判官遷  
奉議大夫知永新州所至以廉能稱

漆希范字文翁才識豪邁善屬文任本縣儒學陞靜江路教授三楚聞其賢辟為椽廡謹修飭省臺器之陞臨江路知事清望益著識與不識皆稱為平溪先生

明

劉謚字成式來蘇人聰慧倜儻善屬文朱學士善見而器之為作藜耀軒記洪武間貢授吏科給事中彈劾不避勢要卒以此忤權貴謫戍甘肅

陳昂字文煥南城陳家湖人永樂甲申進士任陝西西鄉知縣廉明播于閩中歲飢捐俸備賑哀鴻以集而捍禦之功尤著兩臺疏薦擢河南道御史風采屹然貪墨嚴憚祀西鄉名宦著有文集若干卷

潛溟字彥鵬城西人美丰采兩目如懸珠永樂進士授監察御史文皇選使北平命十數事既出追還詰問對無遺上器之後果稱旨受知益深事之難決者輒曰付常眼御史謂溟也都督紀綱恃寵不法御史按之多不得其要領乃改命溟不數日獄具以聞將大用之既而扼于忌者陞廣東按察副使懲奸貪理冤滯得監司體後又以事左遷運判陞知杭州府聲名益重所著有青雲集

朱益字仲益坡山人永樂中舉于鄉已丑中乙榜例授學職率同榜者十人上言道未明未可以教悞人乞卒業辟雍為祭酒胡公儼所重乙未登進士授刑部主事命

于沛縣董運木植事集而民不勞其刑獄平反者甚衆尚書兵中薦陞郎中卒于官檢所餘俸僅給棺衾而已益廉靜寡欲宦游不挈妻孥卒時惟一僕侍命之曰未能報吾君親歸以忠孝二字語吾子孫一言不及私

楊潤字伯玉號澹菴城南朝天坊人永樂進士授南御史善持法嘗有坐法餽金求庇者潤執其人寘諸理陞山東按察僉事勦巨盜劉雄黃虎陞四川左叅議平叙南亂歲丁卯重慶大旱官廩制于請命潤先發粟而後以聞全活者數萬朝廷嘉之先與薛文清講明理學于山東期以百世不磨之真詮至是復聚講蜀中歷官三十年囊橐蕭然累疏乞休得允進中憲大夫歲給祿米五

石人榮之家居讀書考古薄視紛華一日無疾忽召諸子曰吾將逝矣爾等務忠孝勤儉又曰迎朱漢漢潤壻也時為御史人不知其婦明日果以公務至其清心寡欲故能前知如此享年九十有一卒後數日鄰居火子黃祝曰若先君無愧願全歸之俄而火反樞得免祀鄉賢

易輓字仲載上坊人永樂進士以言忤權貴謫武定州同知尋改判杭州時仁和賊大肆剽掠輓用計入其營擒巨魁賊遂平陞高州知府

照舊考通志補入

陳真字孟庸古祖橋人永樂間拔貢肄業成均以文字受知于楊文貞公延為子弟師凡揚公所纂周易本義諸

書與有叅校初授粵東封川知縣廉明有聲秩滿陞刑部主事持法不阿奉命恤刑閩中多蘇淹獄一時蹇公義夏公原吉咸賢之將有不次之擢乃淡于仕進以足疾乞休宣宗朝楊文貞公屢書招之不赴生平勵操冰蘖歷官數十年垂橐而歸諸子貧乏至以缺甘旨為憂真慰之曰吾居官清白粗糲自安何患焉杜門家居以書史自娛二十餘年而卒

陳鑑字貞明十五都人少穎悟宣德進士初授行人擢御史持身清介遇事敢言不避權要按貴州攬轡激揚得體嘗奏毀牛欄關至今地方稱便時宦官王振用事趨者如市鑑獨不往振中傷之傳旨枷于國門先是有冤

者得鑑以白至是為鑑奏請乃得釋尋陞河南叅議所

著有易菴集子賢舉鄉試聰敏克孝世其家

按江西通志陳鑑初授行人擢御史出按順天言京師風俗澆漓其故有五一事佛過甚二營壘破家三服食麗靡四優倡為蠹五博塞成風章下禮部格不行改按貴州麓川恩稅發自大軍再征窮窟屢上書哀訴乞宥罪通貢王振不許復大舉遠征時雲貴軍民疲敝苗乘機煽動舉朝皆知其不可懲劉球禍無爭者鑑抗章言賊酋遠遁不為邊患宜專責雲南守臣相機剿滅無遠勞禁旅振大怒欲困之改鑑雲南叅議使赴騰衝司改諱貴州以已撫鑑為巡按時當請川播州安撫司改諱貴州以已撫鑑為巡按時當請下吏論死繫獄景帝嗣位乃得赦尋授河南叅議致仕歸卒

賈信字順夫山畬人博學負名初臬司辟為椽正統間辦

事南京為南刑部尚書趙翊幕屬部寺災信諳天文先知之言于眾諸部皆以為誕惟刑部先為之備翊器重

之薦授本部主事歷工部員外郎中陞廣州知府先是  
廉屬邑合浦產珠守珠池大監范肆威罔利商賈弗通  
信具奏劾去之商受其惠雷廉二郡軍糧互運民勞財  
匱呻吟之聲塞于途復奏准各運納定額郡人世賴其  
利咸有賈父之稱立祠祀之

况真字彥珍由歲貢歷工刑二部主事福建按察僉事正  
統間鄧茂七黨寇汀州偕指揮馬雄討之有功明年因  
累誤降大使天順間復官僉事致仕真性質直用法平  
恕所至有惠政進階中憲大夫

劉志方字端夫少穎敏善屬文由舉人授僊居知縣時歲  
饑民有攘富室粟者守悉置之死志方曰愚民無知苟  
延旦夕耳非越人于貨者守悟活數十人又有偽獲盜  
布者志方詰之皆曰婦織之耳命各取織菟驗之則盜  
果偽事獲釋其為政慈祥慎密類如此陞知州同知致  
仕所至輒有去思尚書王純主事儲懽惜其去作詩贈  
之

朱漢字景雲清潭嶺人成化進士授太常博士太常寺官  
多出身道流漢上疏極論之陞南道御史劾罷尚書倪  
謙侍郎錢溥歷陞河南按察僉事陝西副使兵備漢中  
風裁凜然奸貪縮首賊盜屏跡民至今懷之歲時報祀  
王謙字文讓成化進士授湖州推官凡所辨析皆盡人情  
常俸不給日用多取于家卒于官

高安縣志 卷十三  
陳拯字方周荷山人由舉人署奉化訓導勤學善教人才多所成就陞卬州判官清而有惠嚴而不苛家居十年化成鄉黨

熊傑字貴顯斜溪人相之父性謙謹作文字不苟成化中以太學生通判保寧府廉明簡易嘗按豪惡母文信獄竭誠感竒夢論死者四十三人上司減其半羈傳舍以配徒一夕火發盡死蜀人神之松茂運梗設法隄備餉足而民便尤能禮士夫善僚友通判張綿吉守任儀米瑞皆詣墓拜曰為我保寧人謝公也著有守齋集

劉允中字叔彞鈞山人其父南塘治產積居嘗為萬石長儀狀魁竒邑令見之曰爾有貴徵宜課子學歸語允中

下帷發憤從從父孝廉志方授尚書疑義未達輒從帷幔中辨析所居山後有洞有神憑焉歲旱率鄉民禱之猝遇猛獸衆莫敢前允中奮臂大呼為民請命獸即去終祠而雷兩大澍鄉人德之允中生而頴秀歲戊子就檄洪川有侯司訓者天台名士忽自輿中望見輒下車握手詫曰吾閱人多矣未有如公者是年果得雋成化戊戌成進士讀中秘書大學士王惟臣嘗言于人曰劉叔彞之文簡雅平寔不事雕琢每一命筆翰林諸公必吐舌庶子改工科給事亟圖歸省未幾訃聞每恨兩尊人之不及永訣也服闋歷禮科都給事多所建明憲廟倚眷特至目為劉長子家故羸而南塘好行其德允中

承之一切俸入盡分族之貧者有逋課輒代之輸或偶  
忿爭必曲為解勸無罵于訟以故劉氏凜凜德讓為閭  
里所矜式丙午同侍御張賓奉敕綜理西寧儲峙初入  
朝隆馬創甚至是以軍國重務力疾驅馳冒塞嶮不避  
權勢軍民德之事竣疾轉劇報命乞骸骨歸舟次臨清  
竟不起年四十八都人士聞而惜之

黃山字允高棠山人成化進士授行人屢奉使不以毫髮  
自污宏治間擢御史時何文鼎以忠諫得罪山上疏力  
爭巡按浙江剪宿弊懲奸貪雖親故無所假借風采動  
一時陞廣東僉事祀鄉賢

朱繼祖字孝思坡山人會魁益之孫柱史實昌之父成化

甲午領鄉薦甲辰舉進士除兵部職方司主事鎮山海  
關陞武庫員外欽差恤刑江南提督武學序當轉為圖  
便者沮出知廣西府會有竹山子之役當道檄繼祖督  
勦或危之繼祖笑曰事關君國義所當赴奚其避遂分  
兵躍馬親冒矢石為士卒先俘獲甚衆賊亦尋降捷聞  
上皇遣使獎賜當事以邊才薦調任楚雄居數年重臣  
有以事經其地者遇之倨且索賄繼祖不悅即日上疏  
乞休不待報而行郡人萬里詣闕以請後晉階叅政累  
徵不起著效顰集及雙溪存稿待刊

鄒誠字一純由舉人授慈谿知縣縣多貴宦誠御以禮法  
無少假借于民之無告者多方哺育之人稱其一清僅

足自存執法多可傳後卒于官民頌之

游輝字公憲正統貢士任浙江龍泉知縣地多刁訟輝恩威並行民咸感德去任之日百姓如失慈母居鄉孝友慈愛宗黨閭里有不平事俱請質焉人比之王彥方云陳祥字應和荷山人宏治進士初授上虞知縣廉明有聲以內艱歸民為作去思碑復補華亭時劉瑾專恣祥獨毅然不動及瑾敗上搜覘籍無祥名賢聲愈著行取山東道御史巡撫四川淡素如寒士時有御史素以賄聞而依憑城社眾睥睨莫敢動祥發其私詔免秩蜀民鼓舞若更生及報命以論堂官忤當事出知惠州府治煩劇吏財凋弊祥決斷如流廷無留獄時有陳半舟之說

桶江巨寇作亂上命贛都御史王守仁偕祥往征之滅其二巢績奏加正三品服俸轉廣東副使歷官右副都御史所著有荷峰集

胡鎮字斯靜號拙峰泰之從姪宏治壬子以儒士領鄉薦壬戌進士授行人司行人奉使淮藩丁卯擢南工科給事中風采屹立望之使人畏憚改北戶科尋轉禮科右給事中彈劾不避權要忌者日眾未幾擢浙藩左叅議以骨鯁不能隨俗俯仰引歸田里著家寶集夙興夜寐箴以訓子孫辛丑聞外患痛恨不能自效條陳七事切中時宜乙巳歲旱民饑多方勸貸以賑之優游林壑二十五載壽登八十有五崇祀鄉賢

敖鉞龍城人直方性成一登科目謂道必可行宰宿松二載兩奏水患去任三年復疏荒糧補潛江甫經十月題水旱祈蠲賑請皇莊開恩江民賴其惠所去見思為御史累劾近侍中外憚之加六品俸巡按貴州奉敕考校兼理征蠻久之致仕足無公門之謁鄉黨宗之祀鄉賢熊相字尚弼號台峰斜溪人正德戊辰進士授臨海知縣行取河南道監察御史方正不阿百僚嚴憚奉敕清軍四司激揚興革風裁丕著巡按山東題表靖難忠臣胡子昭刷卷南京薦理學名臣呂柟密雲之役前後盪平巨寇以數百計累賜金帑陞福建廉使致仕居鄉為月旦所重事利桑梓者力任不辭正德間知府鄭璠重修

郡志皆相所裁定

朱實昌字士光總祖子益之孫正德戊辰進士授旌德令改海鹽應召擢山東道御史上游獵建儲除奸佞等疏議大禮忤時相廷杖改南道歸養都御史屠瀟奏起補北道時淞江機坊為監督所苦實昌奏撤之歷按蘇松時三吳大饑奏緩歲賦三十八萬有奇俟歲稔帶徵後復奏請蠲之上從其議以直言觸當事陞淮安知府居官廉靜士民悅服有卧鎮淮陽去思遺碑

鄒致和字用行孔里人祖居桂林少負才名同里推祭酒正德間以歲薦授蘇州府學司訓署長洲縣事多惠政嘗與唐伯虎文衡山祝枝山輩訂交虎阜備極唱和之

樂吳郡才甲海內致和因文知人一州七邑所作興人  
士盡公輔選如度撫朱宏觀察皇甫沆其一二也刻有  
清泉詩文子魯翰亦以歲薦授兗州

劉嘒字子儀一都人年十九中嘉靖乙酉鄉試授臨城令  
廉潔自持不畏強禦以劄介聞遷通州守諸武弁貴戚  
占田宅者幾半民籍行李往來不勝擾錦衣陸炳有從  
龍功寵信用事家奴數百濫施冠裳以徵租為名漁獵  
州縣莫敢誰何嘒褫其衣冠驅出境炳深啣之使人伺  
其陰事卒無可乘益嚴憚之三年以憂去後補茶陵州  
知州惟一僕自隨尋卒于官自公服外無長物院道捐  
俸贖之始得歸

漆登字汝高烏泥人嘉靖辛卯舉人授貴州永寧知州蠻  
酋雜處登以清敏恪職遠人安之陞馬湖府同知拯饑  
全活甚衆因其俗陋加意造士併捐俸資之麻陽寇亂  
協勦告捷以薦兩典蜀黔考試取士多得人告養歸晦  
跡著述厚于宗黨鄉評重之

况澄字仲源城南人曾祖琛為永樂間進士官永平教授  
有廉名澄能紹其家學為諸生從學王文成公公奇之  
嘉靖辛卯特詔御史拔異才澄膺選第二初知壽張縣  
減民徭役調考城縣築隄通水利民德之以耿介忤上  
左遷建寧教授造士得人陞鳳陽通判清馬政署邑篆  
有循良聲歸而屏跡公庭惟事闕地方利病者則獨持

高安縣志 卷一三  
議侃侃郡邑咸利賴焉

劉文光字月山鈞山人嘉靖戊子科舉人部試第一授吏部司務歷官參議才敏學瞻襟懷磊落與少師夏言內翰呂柟詩文唱和一時才名藉甚所著有霍案錄傳于世

吳山字曰靜號筠泉南城禮義坊人嘉靖乙未進士及第授翰林編修累官禮部尚書加太子太保實錄會典諸大制作多其冊潤性方正有度不苟詭隨世宗重其為人名入直西內一品考績優詔褒嘉晉少保將柄用之分宜相故忌其不阿而山守正自若絕不以同鄉相附上意以山宗伯久次一日故問分宜吏侍郭僕任久不

宜遷尚書耶且曩時閣臣固有四人共事者蓋欲相山而以朴補禮書也山子聞之以告曰聖意已決但請分宜公一揖即宣麻下矣山斥之曰監子何知吾能以一揖博宰相乎事遂中沮其劄方大節類如此嚴世蕃力脅公卿獨不敢干山故相靳貴繼夫人早寡及老其孫有客于嚴氏者奏旌貞節下禮部議山謂婦節宜旌但在宰臣命婦生受殊封恩綸褒其內德者非一矣貞節亦本分事又何事特旌與民間匹婦爭聲名為華亭徐相遇于西內亦揖山而為之言山正色曰相公亦慮閣老夫人再醮耶是時二王並封莫測上旨中允郭希顏從里中言安儲事語侵分宜上怒飛詔就江西斬希顏

而嚴氏勢益重然上因此不懌尋詔景王之國安陸命禮部具儀分宜使人密諷山此非主上本意雖具儀仍當另疏留行山曰國本久未定今幸承旨臣下不能請之更當沮之耶遂按故事請上御殿目送王出大明門上愈不懌曰此成化間兄封弟事也今父子寧必如是乎竟不升殿而眷山漸衰分宜猶以衆望欲交結之乃求山女為孫婦屬閣老李本為之居間山竟托辭謝絕會日食陰雲四翳閣臣皆欲以當食不食奏賀山仰視曰日方虧也吾誰欺乎竟不賀分宜意愈恚密聞于上而山遂被言罷棘穆宗隆慶初即位起為禮部尚書堅辭不拜曰林泉吾分耳安能抗顏于昔而滑脂于今耶

人尤信其始終一操而獨以其不登政府為惜家居卒萬曆初特詔追褒贈太保謚文端崇祀鄉賢

教銑字純之號夢坡龍城人嘉靖進士二甲第一改庶吉

士歷官祭酒太常寺卿已酉主考應天癸丑典南宮試皆稱得人先是邊患孔棘銑疏陳六事語多壯激給諫王德薦其兼文武才奉命宣諭威震中外生平無疾言遽色應事接物婉而曲中然義所當任確不可回嘗從歐陽文莊公講明理學潛心力踐不為宏濶高竒之論以故色笑雍容模範卓立風節凜然施雖未究人爭賢之卒贈禮部侍郎賜祭葬吳文端公為之傳祀鄉賢

藍瑩字完卿高塘人嘉靖進士改庶吉士與吳山教銑稱

翰林三傑遷戶科給事中疏請用飭法甦民庶振軍旅  
深切時艱改禮科時上意修元璧以忤旨廷杖頗有直  
聲出陞湖廣叅政歷四川按察使山東廣東布政使俱  
有治績在蜀蘇淹獄在粵清番稅人尤稱之以違時被  
謗隸言者屢薦起用未果輿論深為扼腕

况叔祺字吉夫幼穎異喜讀書弱冠登進士授刑部主事  
曾署清暇益肆力學問與東吳王元美南昌余德甫游  
從以聲詩相唱和歷禮部郎中貴州提學副使貴州僻  
處蠻方士多質魯弗力于學祺至日為諸生講說經義  
士知嚮方攝司篆平山寇欽賜銀幣祺負才名抗直不  
諂于俗遂棄官歸卜築藥湖之傍興至買棹下章江訪

德甫諸名士徘徊龍沙南浦間弔古賦詩所著大雅堂  
集丹湖督學稿家居捐數百金修梅江橋邑人德之

廖性之上坊人生而醇謹不苟言笑十四補郡諸生十七  
走安成師事東郭先生益篤信謹守毫髮弗自放逸嘉  
靖辛酉舉春秋第二人以名節自矜非公事不入公府  
授山東信陽縣諭以古道風諸生陞松楊知縣六載清  
操著聞陞雲南路南州知州不赴杜門手不釋卷有司  
或造其廬輒以疾辭嘗語人曰咬得菜根斷則百事可  
做此語親切有味居家常以清貧自安云

范級長沙舖人嘉靖進士歷官叅政所至皆有聲致仕歸  
杜門掃軌不與世事不入公府惟以孝友惇睦訓子姓

俸餘盡給親族不畱以遺子孫年八十四臨終語不及他惟示諸子曰汝輩謹飭做好人吾目瞑矣議祀鄉賢傳孟春號仁泉珠湖人嘉靖甲子舉人乙丑進士歷官刑部侍郎初授晉陵司李多所平反擢浙江道御史奉敕巡長蘆鹽事竣巡按順天兼視雁門紫荆等關秩滿陞北畿學政時尚操切以沙汰為事春獨以寬著陞大理寺丞光祿寺卿進南京操江僉都抵任以母憂歸值有毀書院之議春捐二百餘金抵其值事定仍歸之郡服除起兩浙巡撫嘉湖大侵疏請賑卹全活甚多陞北京都察院副都尋陞刑部右侍郎攝刑部事雪鄖撫李材之冤獲從末減年六十致仕生平和平樂易城府不設

而中實淫滑分明時論以大臣稱之

吳會字文鎮號南州南城禮義坊人歲貢士端方純正為諸生時因豪宦侵占學基會冒鋒阻抑力請當道追還建尊經閣歷官嚴州教授致仕家居考定賦役全書有裨民瘼郡侯鄧贊曰未仕之先有功于學政既仕之後有功于生民卒祀鄉賢

何希堯號天池隆慶丁卯舉人戊辰辛未兩中會副宰應山廉能公慎釐剔靡遺頻年異侵扶病單騎撫諭捐俸以賑在任數年日以作人為亟刊四書三說廣給生儒童試閱卷得楊公湮嘆曰此川嶽正氣也拔冠一軍後擊璫殉節如希堯所言論者服其知人秩滿註上考擬

授部曹念親老解組歸一橐蕭然院司助其裝始得旋里應人祀之家居杜門惟倡明理學以課生徒立心制行一本誠正著有文集若干卷康熙間郡司馬蔣公允修擬捐俸梓行以遷黔守去未果

吳文光字德充號字山龍山人父一川號石泉籍諸生有名閉戶著書義方訓子光承先志以嘉靖辛酉舉人為荆門州學正勤課程敦實學日以經明行修勉多士繼任徐州豐縣知縣廉介有為豐頻年水災光增縷水堤開荒蕪田尤作新士類捐俸易學田百畝士民胥慶有頌長春者以外艱歸豐民立祠祀焉語具徐州志門人給事張貞觀有記後起復補懷遠縣淮鹽運判會薦擢

陞宿州牧時州歉甚流移載道比至加意撫循期月而井煙相望瑞徵麥莖兩穗直指晉江陳某校士出表題嘉之事詳宿州志五年擢四川龍安府同知緝盜安民惠政多端任滿致仕士民立石以誌去思居家二十餘載足跡不入城市惟課諸子以明經孝友承先澤為務郡使徵鄉飲大賓者三馬嘗媿宦遊未終侍養每逢父母忌辰即涕泣沾襟哀慕之思慙慙若孺子狀併囑子若孫謂日後吾逝當葬于父側以遂吾瞻依之意其孝思有如此生平以禮自持與人必恭必敬所著詩文及宦遊諸橐藏家待刻卒年七十有九本縣申詳學道註鄉賢冊

范國忠字汝輔長沙鋪人夙資穎邁初事諸生業博學贍詞藻後以例監謁選授浙江按察司經歷遷兩淮運判偃蹇散秩中堅持初服上官心憚之淮大猾曹氏橫甚侵場地建大宅前後諸司莫之何國忠至奪毀之併逮治諸不法卻羨金不啻數千復斥罷屠稅常例贖鍰一切不入私囊譽動吳中死之日身無以歛祀鄉賢

王許之號槐亭分溪人隆慶庚午舉于鄉辛未成進士授廣東龍門知縣時海寇勢甚熾當事者議非大舉不克靖電白尤當其衝遂自龍門移電白密以兵事屬許之至決策靖寇併破了髻大巢山賊兩廣督撫凌公疏薦超為羅定兵備許之力謝不可願以縣令事行間遂持

檄週歷東西二千餘里相要害今立大營把截三奉欽賞皆異數更與凌公條議善後事宜于是海盜盡息民始聊生入覲以治行高等與宴賞丁丑授南京福建道御史已卯陞浙江按察司僉事先是在廣豐城李見羅備兵嶺西以講學負時名相為引重坐是招忌制撫殷正茂尤心憚許之當路將進諫垣殷時為司空造江陵相尼之遂移南御史許之至南中驟言事所上凡十三疏上嘉納之又舉奏內監不法狀亦為近侍者所忌江陵憶殷言慮其建白授指外補而杭嚴兵備之命下浙俗游侈省會居民靡襍奸盜隱匿其中治者苦之許之嚴約束謹期會斷以法一切辨治綱紀肅然會撫軍標

以減餉生變獨兩部不動卒以誑誤罷官時論大為不平許之既蕭然里居日與都人士講學不輟而聲望益重撫按薦疏數上太宰五臺陸公累書勸駕竟不出初高人苦于南兌往往破家供役許之為御史巡視京倉請于朝得從折色其為梓里計蓋如此著有留臺疏草槐亭文集

范世美字敬之長沙鋪人萬曆進士授揚州推官秉法嚴平吏民畏服會偽錢恣行商賈罷市飢民以米戶閉糴執竿叫呼聚黨數千人世美遣行縣聞之遽馳躬詣亂所開諭禍福郡黨解散揚民謂推官一日不歸則廣陵流血矣陞南京兵部郎中出守潤州潤故有織造諸

羨銀又有公庄諸稅歲萬金舊皆太守公費世美悉以備賑每歲運船僉集嚴約啟閘官吏先儘運船過盡始及他船時有鎮撫貴人橫恣恐嚇官吏世美不為假借故在潤數年軍無遮損之譴官無治河之費皆其力也陞山東兵備副使卒卯總計天下循吏奏清苦第一改浙江驛傳副使行之日行李蕭然士民遮道家戶設主拜之尋卒于官世美為人不喜世俗交際孤立無倚獨行已志自理官起家厯官二十年未置一田築一室為子孫計沒之日身無所餘妻子衣僅蔽體後祀鄉賢况于梧字汝材由舉人萬曆甲戌選南直天長知縣數月政聲藉甚調繁儀真時苦淮水泛溢大為河患遂條陳

開便河修築高家堰拮据數載陞嘉興府判兩臺以河  
工未竣題改淮安竟厥功居茂弼况公河功成奏聞敕  
賜金四十兩紀錄陞郟武府同知河道至今賴之

范儁字國士長沙舖人生而穎異為兒時聽讀古文詞一  
耳輒記因就章句師偶以蟾吻為題令破應聲曰玄乎  
棟梁之上沾乎雨露之恩師大奇之曰吾非爾師也亟  
趨歸就經師下帷力學及試輒冠多士學使賓爨何公  
稱為瑞陽麟鳳萬厯丁丑成進士授義烏縣尹有隣邑  
大豪凌其邑長者連起大獄勿決儁至一訊立服所居  
衙齋如水食惟脫粟有以重金匿茗中餽者覺輒卻之  
欲罪其人至慙謝尤加意學校建青雲尊經二閣為諸

生肄業之所查復繡湖侵地百餘畝以租贍貧生又經  
畫一邑之水利或潴或泄民賴永利時天下方度民田  
邑長多煩擾失經儁與民約僅十條不旬日而事定無  
尺寸隱漏者或詫以為神邑之大姓善逋賦其少年好  
勇弄兵儁一一以義勸諭安輯之旋膺內召補湖廣道  
御史風節凜然有中貴丐免房租數十間且托執政為  
言儁竟拒之時上久不視朝儁謂治安不可狃乃以奉  
天道防人欲信詔令廣儉德一事權定章奏惜人才斥  
巧宦養士氣清武事十事上疏言甚剴切併侵中貴遂  
擢上怒三日凡五易旨人無不為儁危者儁亦自謂必  
死恬然待命友人文待詔貽以書曰此時當以槁木之

心為心以死灰之氣為氣僑笑而復之曰君安得借禪以解我吾惟以我之心為心以我之氣為氣耳人服其度先是慈寧宮灾都諫鄒元標上疏未下僑併以為言至是命下各廷杖上盛怒漏下三刻起出朝集百官視杖會雷雨大作執政力救上意稍解僑得削籍事載元明史標謫南刑部照磨即日同出國門時又有曾健齋上言被譴故長安有江西三鳳之稱僑歸杜門數十年絕不交通長安一字後臺省力薦疏數十上銓部擬補浙江道上以僑元標及諸切諫者名書御屏竟不起用老于林壑時論惜之僑天性孝友居喪哀毀過情友愛四弟所得俸餘悉以分給田屋推其腴華者與弟自奉粗糲

以節儉教人喜談詩文養魚種圃以自適所著有蠹餘漫錄歿贈光祿寺少卿僑歿五十餘年佳城未卜康熙壬寅郡守楊朝公館次孫騰雲于署中因捐俸營僑墓表其墓

敖文正字嘉猷號龍華龍城人萬曆丁丑進士改庶吉士授檢討教習內書堂癸未分校禮闈辛卯補經筵日講官時神宗深居講臣循故事以講說進不得見天顏文正講易推否泰循環之理冀其開悟明年擢洗馬署司經局再分禮闈因邑苦浮賦里民叩閭文正為言之大司農會有阻之者遂以病告得旨賜牢醴金幣乘傳而歸己亥詔拜少詹纂修玉牒未幾以少宗伯出領成均

知貢舉值宋史成具表以進語多規切不報改司翰篆  
教習庶吉士再進講幃朝議屢推貳銓而旨竟中格以  
冊立典授階通議大夫祖父如其官生平劉方笑輦不  
以假人一日入都門見執政者執政漫語曰公未稱輦  
上君子亦不佞未了事文正踞馬答曰天下事未了尚  
多而寧是乎執政啣之其直節類如此故歷仕二十餘  
年家居強半心存制行一以同里吳文端公為法尤雅  
重新建鄧文潔出處之轍頗同壬寅九月卒于官贈禮  
部尚書賜祭葬辛酉諡文穆禮臣請卹稱其裨躬一意  
清修仕路取由捷徑人競進而已獨退世尚圓而已獨  
方蓋寶錄也

陳邦科字雋卿號警亭荷山人萬曆進士初知江都縣南  
北衝衢蒞茲者一手奔走逢迎民事置不暇理政多窳  
惰吏胥豪猾相緣為奸邑賦籍相冒坐累貧弱邦科屢  
啟按籍稅之多寡虛實較不可欺至供億之費不漁于  
下而上所徵辦毫不得溢于額擢南臺四載首陳十事  
次請建儲論相申救彭遵古碩允成諸壽賢三進士之  
濫黜訴李中丞材之誣獄按部江上賊挾貧民稱亂又  
疏寬賦以摧其黨而計議其所當縱卒如其言守保寧  
河間盡絕弊孔尤多惠政會有大寇屬國天津隸海門  
尸條備禦十餘事多奇中其材畧類如此去江都民俎  
豆之歿于河間祀名宦焉所著有循良模範言責要覽

辨問錄留臺疏草及詠史詩閻瀛漫語

吳毅字熟之清溪人萬曆己卯舉人任河南舞陽知縣以  
丁憂歸遂恬退不仕苦節著聞

王綦字宗盛獨城人與弟莘同舉萬曆壬午榜授沐陽諭  
分典蜀閬擢令麻陽廉介有聲鋤豪拊善獠苗誓服檄  
調繁邑士民扳卧不得尋卒于官歸櫬日百姓遮送出  
境謠云蒼天悠悠失我賢侯人不我奪天不我留論者  
高其才品

陳碧川赤土人由歲貢官冀州儒學訓導卒祀鄉賢輿論  
稱其孝友義方老而彌篤宦途有清正之譽林居餘長  
者之風

朱吾弼字諸卿社山人萬曆乙酉舉于鄉從李見羅先生  
講學以勿欺自矢己丑成進士初授寧國推官考成選  
南臺時兩宮灾弼抗疏引漢五行志備列天譴之由又  
疏請冊皇儲點閣臣補科道為去三壅撤天下礦稅權  
使為去一蠹不報弼曰事關宗社可一言已乎補牘再  
進時豺狼載道巨璫挽權權窩巨盜幾釀不測弼極力  
糾彈人頌鐵面戊申起南光祿遷大理丞九卿大僚若  
晨星上命首相典試實非令甲葉引嫌弼勸遵旨以將  
順為匡救地言者終非之弼引病歸將十載天啟改元  
起大理少卿尋轉太僕邊事孔棘逆璫作奸弼疏時事  
詞甚侃切然揣璫熾當大熾堅意乞休弼性剛直有大

節南臺政暇與郭明龍劉雲嶠諸公表章朱子之學晚  
歲起田間直聲逾壯林居讀書吟詩立家約化鄉族尤  
篤友誼嘗受蔡冢宰見麓之知撫其二孫如已子忌者  
不能害蔡公不絕如綫以弼為之死友也鄉有虎患為  
文祭之虎即遠遁黨錮禍起每見時事即流涕逆璫終  
啣弼有迎合者構弼以竒禍璫使私人按驗甚急弼雖  
卒家族甚危會懷宗登極誅逆黨孝廉孫恒敬上書訟  
冤事遂解自少至老公誠直道允踐勿欺二字易箠猶  
以訓後所著有密林漫稿奏疏數卷行世祀鄉賢

按明史吾弼萬曆進士授寧國推官徵授南京御史  
大學士趙志舉弟學仕為南京工部主事以賊敗南

京刑部因志舉故輕其罪議調饒州通判吾弼疏論  
竟謫戍之奏請建國本簡閣臣補言官罷礦稅不報  
山西巡撫魏允貞為稅使孫朝所訐吾弼乞治朝欺  
罔罪廣東稅使李鳳乾沒奸人王遇桂請稅江南田  
契吾弼皆疏論其罪雷震皇陵吾弼請帝廷見大臣  
講求祖宗典制與天下更始尋復言陛下孝敬疎于  
郊廟惕厲弛于朝講土木惑于宮苑榛蕪偏于殿庭  
羣小橫于中外正士困于國閭閻以礦稅竭郵傳  
以輸輓疲流亡以水旱增郡縣以徵求困草澤生心  
衣冠喪氣公卿不能補續臺諫無從引裾不可不深  
察而改圖也未言禮部侍郎郭正域疾惡嚴居已峻

不可以楚事棄請詳勘且言王既非假何憚于勘遂  
為首輔沈一貫所惡移疾去居三年起南京光祿少  
卿召為大理右丞齊楚浙三黨用事吾弼遂辭疾隸  
熹宗立召還累遷南京太僕卿天啟五年為御史吳  
裕中劾罷

傅文華字日茂號元樸珠湖人萬曆辛卯舉人兩中會副  
初任奉新教諭課士有聲丙午聘充雲南同考所拔皆  
宿士陞故城知縣旱蝗洊至竭誠步禱竟獲甘霖復捐  
貲賑濟全活無算又令民捕蝗一石免賦一斗條上如  
議秩滿陞平樂府司李釐奸祛蠹風節凜然所屬賀邑  
有稅監稅者歲數易官華以廉平尋委諭歲賀素鮮水

患忽夏潦衝汎其時民多至漂溺華多募輕艇撈救賀  
人頌華有蘇商興學救災之政以贊巡旁午脾病致仕  
陳良材字養之號豫華赤土人生時雷震有貴徵父碧川  
司訓冀州良材已成進士由比部轉郎中初授兗州守  
晉福寧憲副謂金山俯瞰東城不據是藉寇資也建議  
築之樓其巔曰無敵又礮山臺山增置戰船有舳艦相  
望之勢設遊舸置材官往來偵守春秋兩汎屆期駕舸  
遍歷要害甃宮蜃火之渠不敢向公治肆一喙焉以閩  
臬致仕

王庭芝字時瑞湖東人生而穎異試輒高等萬曆甲午領  
鄉薦授壽昌知縣治多善政興利剔弊邑人便之竟以

今校浙闈午于署肖像以祀且誄之曰來暮不勝吁那  
堪奪乳慈痛民蒸佃髦試士殞荆闈天日熒成夢桐居  
淚作詩歌棠翻賦鵬忍讀峴山碑

陳儒字子明號鑑章赤土人萬歷乙未進士由嘉興令至  
山西河東憲副辛酉陞雲南瀾滄道叅政告致歸里敷  
歷中外二十七年所至輒有聲慷慨激昂擔當獨步不  
趨權不畏勢不避難不辭賤當神宗深宮不出東林講  
學赤熾烈燭于天下碩涇陽為盟主附之者皆人望攻  
之者亦皆人望究竟附之者名攻之者亦名惟儒以實  
勝之無講學之名修講學之實勤其職業端其軌轍光  
靜其神明令嘉興以此倅常州以此贊憲司以此司刑

曹以此守建寧潞安以此而監司河東則單騎定亂益  
發皇恢霍之嘗閱東林公案獨儒維世道人心一疏中  
云碩憲成還其為碩憲成李三才還其為李三才即吳  
亮自安其為吳亮何議論之有此數句括盡大易剝復  
夬姤四部而滿朝之附之者與攻之者俱可以掩面縮  
躬而退矣儒家居一十三年蕭然淡素規畫地方利病  
抗節于魏璫橫行之日皆鑿鑿有條撫院奏薦十餘次  
年八十一祀鄉賢

劉曰珩字季白號澗雲鈞山人萬歷丁酉鄉薦庚戌授丹  
陽教諭課士得人秩滿陞閩中知縣潔已字民循卓冠  
于兩川當超擢會涿州缺守典銓以三輔要地非著素

望者不克任乃擢珩守州珩首修郵政大創响馬捕蝗賑饑事事康濟尋內遷北京工部屯田員外奉差催餉閩省復命晉郎中以朝廷崔魏之黨不清一意乞休生平攻苦殖學善古文詞而不溺于文甲子八月與京闈之役墜馬傷臂因作一手責文蓋隱然示天下以手援不可之意矣里居十餘年性至孝友封君三奉玉音尤以未沾祿養為恨事諸父如父官俸所餘悉給諸從自甘儉約族中子弟才雋者多方造就月立會課具供給躬親較閱故鈞山一時人文之美甲于郡中而其子丹生為首發云

熊茂松字如承號衡臯中萬曆丁酉鄉試初授滄州知州

有惠政鄰邑訟者咸請質于滄州聲譽颯起薦書十七上例應內擢以裁損驛遞厨傳失權貴意故沮之量移汀州府同知汀屬八邑署篆者七所至興利釐弊必為久遠之計七邑建祠以祀兩膺首薦時京師武備久弛朝議設三大營府經歷專董戎事茂松以才推內轉右府經歷管神機營務清出造作糜費銀三萬兩汰武弁之冒濫者六十餘員戎政尚書朱光祚特疏以薦尋轉刑部員外陞郎中屢讞大獄平反無冤俸滿出守寶慶愛民愛已一如治滄治汀寶人肖像立祠署額真清置田供祭居家孝友無間焚黃之日墓產雙芝郡人士咏歌以紀其事生平操守介然郡邑長雖多舊遊不一干

以私惟為桑梓計則不遺餘力如舊例減徵之類竭心血以之詩文書画贈灸一時所著有餘青館集東軒遺稿行世閩楚皆祀名宦

鄒嗣藩字我介號屏南桂林人幼貧甚天資穎捷奉父家督下帷攻苦十九補諸生名噪錦江丙申食餼丁酉領鄉薦性素清介為孝廉十七載不以隹字通長吏癸丑授東昌夏津諭遷粵西羅城知縣以病歸補河南汝州學正循例轉知順德內邱三載卓異聲著時璫熒甚熾朝議各州郡建祠肖像奉行幾遍方國鉅鹿又三輔近地勢不能後嗣藩進危言于郡長堅持不可及後璫敗一郡九邑免于波靡之議實嗣藩成之丁卯入計當奏

最主者擬以循良畱部會失梓里臺中意乃外遷揚州江防同知瓜地瀕海控江諸無賴子稱天罡稱地煞恃要津覆翼蟠踞江城擇肉而食嗣藩至廉其奸立殛渠魁趙科閔憲等餘黨斂跡瓜民如登衽席郡守徐公擷其能報于上兼攝清軍司李二篆而性清介不解逢迎忌者搆于直指誣以才力未優需調補或曰瓜羶缺也當事者笑豈河清乎一調停為便嗣藩正色拒之曰瓜缺雖羶我官不羶火性則熱水性則寒寒熱之性固有定也安所得私即解組致政歸琴鶴蕭然瓜民遮道里居十載課子睦族終歲不入郡郭郡守馬公史公邑令蔡各典型事之壽七十四

熊楫字用川號懷軒高明門外人隆慶己巳選元萬曆丙子舉人任廣東龍川縣令耿介自持廉明有聲以王事卒于京囊篋蕭然同里朱太僕賻之始得歸櫬

陳邦瞻字德遠號匡左荷山人萬曆壬午以禮魁鄉試戊戌以尚書成進士初授南廷評獄無冤民尋陞工兵二曹覈省歲餉萬餘金改勲部有人倫鑒太宰曾見臺深器重之陞分守杭嚴攝數篆咄嗟立辦錢塘故有湖盜蹇徒為民害公廉其主名置法地方以安陞任閩臬持正不阿時中丞欲薦一私人憚邦瞻不敢發晉右轄以艱去服闋起分巡河北捐贖錢數千濬渠築堤開水田數千頃復教以南方桔槔法為百世利又建滄陽書院

集士子講習磁人尸祝之晉左轄處置藩祿嚴出納禁羨耗諸所興革甚衆已而巡撫粵西歲大侵設奇救荒民忘其飢遷兩廣總制時上林土官黃德勳弟德隆及子叛德勳投土酋岑懋仁懋仁納之襲破上林殺德勳掠妻子金帛守臣問狀詭言德勳病亡乞以祚允繼邦瞻請討于朝會光宗嗣位即擢邦瞻兵部右侍郎總督兩廣軍務遂移師討擒之海寇林萃老嘯聚萬餘人侵犯海濱邦瞻扼之不得逞澳夷築室青州奸民與通時侵內地邦瞻焚其巢召拜工部右侍郎未上改兵部進左天啟二年五月疏陳四事語皆碩畫又極言婦寺之蠹畧謂上用宜節以免加派又謂乳母客氏既出復入

宰相倘有杜祁公便當封還詔書奈何政府不爭致上  
罪謫言者再臨拒諫之失辭甚審諤嚴旨切責邦瞻不  
為懾已上載明已又條上安邊諸務時四方多事邦瞻

總理三部日夜憂勞邁疾卒旅裝惟故衣二箱而已性  
渾厚態度温晬而矩矱則截然不可犯每論天下事義

形于色博極羣書手不釋卷深有會入宦閩時刊布諸  
子語錄敬齋居業錄整菴困知記以救陽明良知之偏

詩敦厚有氣得唐體文章根本六經有歐曾風經濟未  
盡舉朝惜之所著有荷華山房稿皇王大紀宋元紀事

本末晚修宋史未竟贈兵部尚書鄒維璉為之傳壬申  
祀鄉賢附明史所載曰朝政弛則士大夫騰空言而少  
實用若陳邦瞻思泉濯鳳神董應舉等尚思

有所建立惟不逢明作之朝故所表見止一耳蓋近高  
洪文衡諸人皆以清素自矢白瑜論鄭氏微能持平固  
卿貳之鈔鈔者然

熊廷相字良甫號鳳原北城叢桂坊人洪才博學七赴棘

闈以麟經擬弁者再幾得復失由歲薦授舒城學正陞

四川遵義府推官飲冰茹蘗聲動當路直指首薦轉雲

南新興州知州廷相引退三具疏得俞優游林壑四十

年閉戶著書不齒竿牘至若民生利病毅然自任如浮

額封事無不經其裁定守令交相倚重捐館之日都人

哀悼經十餘年論定學使者允兩庠公請附祀鄉賢議

者謂其講學似白沙雅量似婁公蓋無愧云著有闕疑

錄菴菁軒稿勸戒圖鑑藏于家待刻

楊繼韶大路人萬歷選貢任湖廣安鄉知縣監文廟建義倉士民懷德陞嘉興通判有惠政民咸感戴各立祠祀之今楚越均有遺愛之思

舒翀字長翰蒲蓉城城北人性狷介少事攻苦髫年補諸生試輒冠軍郡守馬維陞延課署中其執經門人先後成名者指不勝屈闈試十數科累中副車崇正乙亥特恩拔選部試天下第一授直隸河間府通判管宣府中路事奉部檄築城不憚勞瘁歲飢司農告匱軍餉莫繼委翀賑濟捐俸相資歷三載日以軍譁民變為虞撫綏兢兢卒獲安堵三院疏題翀力乞休數請乃允父老涕送之里居之日都邑大夫奉為道範焉

吳吉初字常吉黃筮人性簡淡徙居城市課生徒而外一切不與聞乙亥拔貢授粵東番禺縣丞適會城歲歉院司委賑飢捐俸以助兩臺疏其事陞河源縣尹征輸不名羨羅浮山寇竊發鄰封蹂躪獨至吉初治不忍犯解組之日行孚蕭然同門朱總憲有廉節可風之譽

梁維新號鍾石二都銅湖人領崇正庚午鄉薦經魁癸未以會副特恩授四川遂寧知縣中途聞大行之變未抵任而返鼎革後隱居高尚司李康公聞其節招之出山固辭不就翌日無疾逝曾有致命詩云底事牽愁到鬢邊女媧難補杞人天孔書不是終南徑生死關頭已了然可以知其志操矣先是都人苦水患維新請邑令蔡

獨一鄉賦築堤數里至今賴之

陳翰廷字維城陳家湖人元琛長子敦品行尚經術與弟輔廷同稱領袖丁亥應貢北上授廣昌司訓轉南豐教諭南昌教授商城縣丞陞陝西漢陰知縣邑故疲困翰廷衣布食素字民如子大兵駐興元單騎督運釐剔之暇日課生儒披沙揀金有李令泉孔文休再見之謠後以洛中署篆註誤開復候補卒于漢陰士民哀之相率歛錢助次子序扶櫬歸里著有恕菴詩集

楊世清號懿安一璉之父幼習文業尤熟春秋中萬曆丁未科武進士任廣東南韶裏海守備時武備廢弛海寇倖至公率疲卒數百禦之糧餉不繼拮据調助羣感其

忠誠奮勇爭先殲厥渠魁獲船隻器械無算以功陞四川都司勅贈安遠將軍致仕杜門不出當事甚推重之為之詳請建名宦才將坊于拱辰門外

袁一修起家椽曹有寔行初選承天府照磨值沔水暴漲悉心築堤以防民患捐俸以賑飢者遷整屋主簿終南賊發招安之役頗有勞績再遷遵義經歷奢酋亂受委督兵殞身王事父老哭尋其骸殯焉總督朱公燮元特為請卹

國朝

熊坊字嘉會北城人幼讀書能文儻有遠畧務為有用之學嘗語同輩曰聖賢學問當求有益乎民生國計豈

在章句間乎由選貢赴部謁選初授蒼梧知縣循良懋異有名父杜母之稱督撫重其才猷以特薦陞鳳陽府同知佐郡一意愛民黃堂資其贊畫三攝縣符雖衝繁劇邑無不恢恢乎游刃有餘丁艱服闋補常州府水利通判肅清漕政諸弊剔除致轉輸之不乏蒞事治民凡厯官之地隨其所值無不以實心行實政冰心持已鐵面對人其素志然也解組歸里紳士奉為楷模纂修邑乘凡有疑難悉往就正焉

朱珊字玉樹號鏡湖古唐人康熙癸卯領鄉薦廿載孝廉常以民瘼屢念向來高邑耆甲殘缺井里蕭索徭役若多浮額趨給迫無息肩厯年最久受累極深珊目擊時

艱挺然倡首備具利病累請當事縮齒併甲題報定例合邑德之壬戌成進士除庶吉士讀書中秘館滿授兵部職方司主事遷員外轉戶部廣東清吏司郎中壬申擢河南歸德府知府在任政簡刑清仁民愛士奉

命解米

潼關洛陽孟津等處賑濟飢民凡往來費用俱係解囊

一切科派陋規盡行革除既而解組歸里閉戶著作刻有鹿峰吟彞山吟燕臺草尺牘小品勸善諸篇行世且善書畫又善琴天潢裕親王惠親王並器重焉裕親王親賜花滿曲江匾額惠親王親賜琴書自得匾額當代名公皆仰慕之如中堂張京江甬上仇滄柱三楚金會公南海洗三山尤加敬禮而列公詩歌贊頌已彙成

帙生平無疾言遽色實有包容大度辛亥纂修縣志冊同諸君子贊勳有功壽七十有七而卒

徐日昡字潤友號敬齋生而岐嶷長益泮勵讀書作文不作第二人想年十八補博士弟子員當制藝靡弱之後昡獨能以方城為宗寢食不懈康熙丁卯鄉試第一戊辰成進士選授翰林院庶吉士勤肄國書旁通子史詩古文詞卓然成一家言丙子典試山西咸羨得人晉庶子歷講讀擢國子祭酒在成均七年整飭科條甄別課試遇有傑出之才獎拔不遺餘力故一時人才蒸蒸蔚起甲午主順天鄉試一秉公慎所取士皆魁竒卓犖冠冕羣倫共稱得人之盛寒冰玉尺未足以喻之晉少詹

掌坊事幣帛書籍領自內府

溫綸疊錫以江國書生素鮮結納而名動

主知歷階侍從蓋其文章氣節當時實莫與比倫者人以為有

舒梓溪鄧文潔兩前輩之遺風焉日昡學有本原嘗曰未靜宜主敬既敬自生靜得濂溪主靜之旨性至孝痛父母歿寓齋書停雲二字以誌永思其為文雄深肅括著有停雲齋集敬齋稿行世唐子崇祀鄉賢

朱軾字若瞻別號可亭坡山人人生秉異姿弱冠束身勵行心通經史學聖賢體用之學言動不苟原本日深為今古文成一家言雖僻立蕭然志不在溫飽識者謂有先憂後樂氣象康熙癸酉領解甲戌登第選庶常改授潛

江知縣以清直著潛多水患俗做賦繁軾拯救匡挽無遺力頌聲大作有鬪毆命案據情審擬忤長官意軾曰故殺罪不赦畏黜枉斷不為也卒應卓薦遷刑部主事陞郎中己丑分校禮闈隨督學陝西本平日所得力于其鄉先儒橫渠先生身心性命之實學為諸生勸謂張子生平宗旨在于知禮成性變化氣質于是刊錄其書標闡開示正學豁然大明而頽風振積弊蠲秦中尸祝沮豆謂自楊文襄以來僅一見歲試冊報部科缺費中以遲延議降調科試尚餘二府比鄉場三秦七千士齊詣無軍處丐保留聞于朝尚書韓城張公奏言朱學使公慎廉明寔空前絕後軾由是得竣科試事代者至坐

觀以待壬辰補光祿少卿乙未起四級擢奉天府尹威惠兼行而鎮之以靜旂民安堵邊境晏如尋轉通政使巡撫浙江下車以察吏維風為急務而獎廉懲貪去奢從儉皆身先表率之一時吏播循聲民崇古道稱天下治平第一海寧上虞等縣數被潮患或築塘或改土塘為石塘工程大議者多難之軾執奏得請至今塘固民安視西湖蘇白堤厥功懋矣庚子陞都御史丁父艱聖祖倚毗方殷留任守制軾請終喪疏七上不允時西藏用兵乃奏請墨緣從戎得差往山陝辦賑濟條陳事宜如罰貪員禁遏糴勸捐輸平糶截漕水利倉儲開墾安撫流民諸荒政並照請行其積貯疏則通行直省天久旱軾

虔禱立雨晉民有動天地泣鬼神之頌事竣請假葬親  
不報再差往山西試行水利社倉旋又差往陝西會審  
魏二等案還朝始准給假歸家辦葬事甫竟

聖祖升遐即星馳北上

世宗嗣統勵精求治任軾如左右手

御書朝堂良佐四字賜之轉吏部尚書癸卯

恩科典順天鄉試加太子太保晉加太子太傅母八十壽乞假

歸慶

欽賜御書匾額對聯及帑金珍藥緞帛坐物回京典

恩科會試又典甲辰正科會試已補授

又華嚴大學士兼吏部尚書寵眷日隆任愈重而謨猷

益廣直隸興修營田水利軾與怡賢親王殫心經理

備極慘淡丙午遭母喪堅乞終制同日三奉

優詔慰留之賜祭賜帑金暫准回籍守孝百日軾感且泣歸營

葬畢迫起身將抵都已奉

特旨遣學士何國宗副都統永福出迎賜膳着在內閣兼吏部

都察院行走照怡賢親王例素服視事凡朝會宴饗

俱不必到嗣以失察呂留良私書鐫職留任未幾復原

職總修律例書成議叙兼管兵部尚書事又兼翰林院

掌院事乙卯浙江海塘大工興總理者難其人軾請願

往報可遂行至德州聞

世宗賓天回轅及阜城接奉

純皇帝詔旨召還着總理事務王大臣處協同辦理賜世襲拜  
賜世襲拜他喇布勒哈番先是

高宗在藩邸軾侍講讀啓沃多年信重有素股肱心膂于軾攸  
寄軾亦念受

三朝殊恩知無不言言無不盡獻替可否毅然以天下為己任  
凡保薦賢員普免浮糧恤刑馳封等疏皆乾隆元年所  
奏允施行者

思科復充會試總裁官又充三禮館總裁官夙夜盡瘁八月疾  
大作

高宗累賜醫藥帑金諭 和親王先往看視次日  
御駕親臨注視良久慰問者再既歿

高宗輟朝一日復親臨哭奠恩禮優渥超絕古今軾為人簡重  
端嚴志潔行方中立不倚外捍封疆內安社稷匪懈之  
誠數十年如一日晚季益沉潛宋儒理學言行必碩體  
用愈純以故疊承

恩寵極人臣之分無間言者易簣日遺疏惓惓以正君心培元  
氣抑聚歛燭賢奸為陳說壽七十有二

欽賜勅葬加祭兩次贈太傅入祀賢良祠謚文端所為詩古文  
手定傳稿著大易春秋詳解禮記纂言周禮注解儀禮  
節畧訂正大戴記呂氏四禮翼孝經管窺溫公家範張  
子全書顏氏家訓又輯歷代名臣名儒循吏等傳百餘  
卷與輶車雜錄廣惠編諸書並傳于世子必楷大理寺

卿璠翰林院侍講學士左春坊左贊善必坦世襲騎都尉任刑部郎中

徐佐字翼之號仁軒仁濟坊人  
中康熙癸卯武科公守直隸河間衛協理屯民恩威並用聽斷虛公民無冤獄一時囹圄肅清剔盡從前積弊衛民雖悍久且自化並督河工防護惟謹受任七載堤無衝決遠近居民地畝廬舍共賴安全居官治行歷歷可稽其家居未仕時即心切救民康熙庚申辛酉間邑之胥役擾民特甚佐不避嫌怨以一人獨任呈請禁革上憲洞燭審寔究擬大中丞安公檄飭勒石永禁刊刻成書至今猶存各鄉夙害頓除民籍以安厥後科甲綿延仕籍踵興咸食其報云

梁以漢倚漢字天章號水亭溪上人領康熙丁卯鄉薦已丑會副任山東登州府棲霞縣知縣棲地海濱疲劇難治漢至持廉守正盜賊遠避橫暴屏跡時有豪貴謀霸孤產欲干以私挾以勢漢正色拒之豪亦慚服合邑既懷其德又畏其威解組士民扳轅卧轍如失慈母孫峩山送之以詩有涸轍甫挹西江水文旌旋返南浦雲子家郁貢成均家駒登賢書

毛彥繡字憲秩號水橫港人天性孝友聰穎異人初應縣試劉祉取冠一邑人服其識弱冠補弟子員隨食廩餼戊子領鄉薦家雖壁立清介自矢居鄉督課後進以敦行立品為先所得束脩奉養高堂婚配弟姪不私其

子故終身未嘗析箸宰祁門其地文教少衰身繡捐廉  
俸倡修學宮聚生徒肄業其中簿書暇親往講貫文風  
遂振連科獲隸者甚多歷任三載冰蘖自矢而安良善  
戢奸宄則不遺餘力也恩威並用士民戴德循聲上達  
藩撫議以卓異會丁內艱歸里在祁之日衙齋不延幕  
友躬自勞苦養廉之餘稍置田廬三子兩弟三服均分  
人咸稱其孝友服闋起部補職卒于京迎柩過江寧祁  
人不遠數百里奔號弔奠其德政之感人如此子世興  
世隆世榮俱髫年遊泮皆謂孝友清廉之報

劉振昌字麟子號後湖西陽人選貢任浙江壽昌令健之  
孫邑庠生鴉之子為人謙光和藹淳謹信實穎慧絕倫

少孤事母至孝弱冠領康熙辛酉鄉薦辛未會副任番  
陽教諭課士甚勤沐其教者如坐春風中貧士執贄見  
者輒卻不受或至捐俸以週困乏時歷義學蒙館為童  
子正句讀冠者評會課在任十五載陞南昌教授未赴  
任卒于鄱署囊乏一文多士斂財助殮引紼之日黎民  
亦皆號泣奔送見鄱陽名宦志

徐爾大字域三一字訥菴襁褓失恃及冠肆力詩書三年  
而成舉子業中癸巳

恩科鄉試時方廿齡也試南宮屢薦不售遂外簡為民牧宰陝  
省之麟遊縣者九年其治身也刻苦嚴密其造士也養  
與教俱其撫民也若慈母保赤事上則敬而無諂事有

不便民者即告大憲銳意行之敢為抗爭不苟為阿順以故沉淪不遷後因疾乞休去麟之日士民餞送流涕扳轅如別父母肖像祀之

陳守創字業侯號木齋荷山人也十歲博游文藝有神童之目年十九領康熙丁卯鄉薦甲戌成進士授翰林院庶吉士散館改知保定府高陽縣事赴任值奇荒請發倉賑飢格于上官慨然曰際吾民展轉溝壑之日忍立而視其死也乎矯檄發之叅罰不辭也爰是民慶更生有滿地和風來內翰一天甘雨自西江之頌又我

朝圈地給旗人高陽圈地二萬餘畝先時種園地者止輸地租後并稅及廬舍許訟累歲乃判曰焉有畊地而露

處者哉于是圈地房舍永不收租撫高陽十有三載興養立教發奸摘伏不可枚舉以薦拔稍遷知順天大興縣事丁艱扶櫬南隸哀泣烏烏悲感行路服闋時朱文端公巡撫兩浙特薦天下賢能三人創居一馬

**聖祖仁**皇帝以海疆要缺需人授江蘇常熟縣常熟劇邑也賦額二十餘萬積年逋欠不清創任事官不收火耗役不聞需索邑之人歌曰陳公第一好清官國課徵輸限獨寬昔日許差差役費而今俱作正供完尋奉行取授舊太倉監督旋陞工科給事中調中南倉監督康熙六十年時值

世宗憲皇帝為藩王日奉

命查倉親覩徹筭一篋布被一床庖厨所炊僅僅黃芽菜小米粥而已

世宗頌謂之曰太倉之粟陳陳相因豈少監督飯而苦節若是耶是天下第一賢員也不踰月而

世宗續承大統首擢為順天府尹雍正元年授倉場總督兼戶部右侍郎數月之內起列巨卿知遇之隆近世以來未之有也創膺天庾重寄剔弊除奸詳載定典至今旂丁無追呼之擾漕運無遲悞之弊皆其力也雍正五年奉旨較閱會試迴避卷夏兩連綿米色滲濕落職賠補估計家產僅得銀四百三十兩有零歸家杜門中丞謝公聘主豫章書院訓諸生以正心修身之學不徒為帖括家言一

時從遊者類多明體達用之士雍正十三年十月

純皇帝御極追念先朝耆舊

召為順天府尹創兩尹京地正已率屬明察鉅細清操勁節老而益堅尋遷都察院左副都御史旋以年力衰頹累疏乞休

聖主溫諭再四固請始得允歸里後優游林泉或偕父老追往道故或與後進講學論文年七十有九終于家著有舉業字學會通易經講義四書制義易經文稿留餘堂全稿行世

朱焜字仲昭號丹亭北坡之次子軾之仲弟也自幼氣宇

軒昂姿性英敏與兄軾閉戶讀書淹通博洽砥行礪節鄉曲咸推重焉後軾貴而焜屢試不售援例入太學選滇南賓州州目所知謂非宦遊佳地焜曰官雖小地雖僻亦有治民之責一絲一粟不敢濫取而于興利除弊有益于民者無不毅然為之上憲憐其才大而小試委之入都以圖大用而父老攀轅不忍別後効用軍前以功授漢中西鄉縣令到任務以德化民設立義學作養人才刊有省身錄呂叔簡先生刑戒未幾以撫字心勞得疾竟卒于任黃童白叟無不涕泣哀號焉

劉太清字平宇鈞山人也生而穎秀以遠大自期器識度越恒流由國子生隨例謁選簡發雲南試用初署石屏

州兼管大理府錢局夙夜勤慎鈎檢簿書區處得宜吏畏民懷政聲大著隨委分修金沙江雖工程繁鉅凡諸險要不久完固告竣遂補蒙化府經歷其地西界緬甸氣候炎瘴不辭勞劇馳驅霄霧邊塞救寧題陞永善縣知縣以瘴發邁疾未及赴任而卒使天假之以年得以展其經猷功名事業未可量也乃豐於材而薄於算聞者惋惜

朱之鐸字警我幼從祖訓指授有方為文崇尚理法得先正之遺中乾隆己未科進士授臨江府教授正身率士課業先德行而後文藝有蘓湖風範卒於任樞歸白衣冠送者環河如堵皆為涕泣

朱必坦字履吉軾之幼子自幼岐嶷軾甚愛之嘗口授書  
為之講解即曉大義稍長好詩古筆力高超中雍正壬  
子科舉人以廕生任刑部郎中讞獄平反人稱神奇為  
長官所器重體素多病告假歸里閉戶靜攝卒不永年  
陳規和字育仲荷山人幼孤事母至孝以祖守創廕入成  
均讀書例滿授中書居官清謹有祖風歲辛酉祖到任  
和乞假送歸依依祖側不忍遠離越七年祖以壽終和  
哀毀致疾疾愈復發卒不瘳彌留之際有淚無聲若惓  
惓於其母者妻章氏喻其意以奉事太孺人如夫子在  
時為任乃瞑時年三十有三無子人有伯道之嘆

吳學濂字遜周號淨友城南石橋頭人康熙壬辰歲貢授

臨川訓導教訓有方臨川士子勒有教思碑臨行復勒  
去思碑及刺天慶元音詩集以誌誣思特陞知縣歷任  
新陽原新陽有新荒田畝深為民累詳請豁地丁銀一  
千五百餘兩漕白米一千七百餘石調任溧陽有開河  
築堤救荒課桑修 聖廟立義學修溧陽邑乘興育嬰  
養老諸寔政溧紳大學士史公貽直大宗伯任公蘭枝  
立有碑文現暨溧陽學宮并載溧陽誌勤勞卒於任勒  
有遺愛碑文詳溧陽縣志著有對筠課藝鶴山吟詩集  
行世

盧立功字賞懋上湖人夙負聰穎學行兼優中康熙丁酉  
經魁乾隆二年任廣東增城知縣上憲嘉其廉明遷南

雄通判嶺表風俗大振迄今士民歌頌不衰以上俱舊志  
朱必堦字玉墀號愚峯文端軾之冢子丰姿岐嶷氣度軒  
舉癸卯以

恩蔭授戶曹旋擢郎署復膺

簡命出守天雄軾為子懇辭

上問何故以保舉無人對

上曰朕自保之其可乎迨抵任政簡刑清闔郡士民罔不悅服

先是直省風俗父母歿延僧道誦經又邀梨園子弟演

劇觴客恬不為怪堦惡之于是曉以大義發其天良俗

乃易尋歷鴻臚寺卿轉彘史遷都察院僉憲隨晉通政

司右通政丙辰丁外艱扶瀨歸辟踊哀痛見者莫不掩

泣服闋補太常寺正卿適東土災青奉

上命查核條陳四事皆切國計民生原摺

上親批發深嘉與之陞大理寺正卿倚任方殷而堦淡於仕進

告假還鄉矣林下圭璧飭躬不事干謁書法精妙索筆

墨者無虛日或有強作解事詢及政府輒默不應辛未

覃恩誥授通政大夫辛卯恭祝

萬壽卒于京年臻七十

朱璣字聚五號碧齋文端軾次子天資竒傑學問淹博厚

自期許一望知為天祿石渠之選雍正癸卯鄉薦乾隆

丙辰進士

欽點翰林院庶吉士讀中秘書散館授檢討旋晉右春坊右贊

善為青宮領袖復晉侍講學士顧問彌殷會

覃恩誥授中憲大夫辛未科會闈充同考試官分校易一房得士八十有二若陳筠張素鄔昇輩皆一時名下士國子學為九州儲才淵藪璣司業其間多所成就化雨宏敷桃李成蹊者蔚然壬申奉

上命祭告嵩山恭恪將事無忝乃職自釋褐以來屢膺清華重選如衡文造士祀神諸大任惟璣是寄知遇之隆

主恩之渥夫豈偶然哉生平飭躬端嚴動必以禮謙和其素與物無爭而事關大典則風節凜然確乎不拔癸未告致歸里卒于途次厝于西龍山

吳學山字靜思龍山人由歲貢生考授鑲藍旗教習觀政

兵部充內廷行走乾隆乙丑選授安徽霍山縣令操已嚴重涖官清惠不可干以私甫下車見邑中科目寥寥爰課生童拔其尤者獎勉之季課月試以鼓勵之暇日又為之講說經義人皆感奮山曰科目盛衰雖本人傑亦資地靈昔范文正公守饒右卜移鄱學於芝山之麓謂地形宏敞必有大魁名世者已而彭汝礪果以第一人入臺省著風節霍邑百年來寥落如是豈地勢容有未振者歟爰於東南隅建文昌宮以培養形勢既而念曰霍邑生監不下百五六十人而三載與賓興試優等率不過七八人雖欲雋得乎加以科舉例嚴學使者又駐劄太平府路途紆遠資斧艱難雖錄遺亦為罕至遠

有亭雙公督學安慶山具緣由上稟因得科舉五十餘名錄遺另稟咨送又得三十餘名是科鄧生曰萃果中魁選嗣後周生仲連鄧生之駿程生在嶸皆先後掇巍科而程生復捷南宮皆山所特拔而賞識者也科名自有定數邑人皆以為百三十五年盛事非山固莫由至此庚午壽州水災委勘者與州牧隙竟以不成災聞復委山山窮歷鄉邨分別輕重稟請開倉便宜從事道憲許松詰曰前勘災者止說三分何參差若是因親勘則大水汪洋僵尸滿野乃悉如山議壬申楚匪煽逆蔓延江省山不避險阻悉力搜捕匪黨以次就獲其牽涉無妄者虛中研詢立請矜釋一時賴以昭雪者且數十百

人獄成議叙軍功一等加一級乃乞養親以歸蒞霍九載兼攝英山篆六安州篆清惠端莊愛民禮士所至有報

徐尚忠字移作號靜齋日暄之孫爾昌之子年十七入郡庠旋食餼由辛酉拔貢充補右翼宗學教習歷任福建漳州通判及光澤寧化連城漳浦諸縣循良報最士民悅服旋擢任廣西賓州永安鬱林諸州迨署泗城府篆其年六十有七卒于官子二並登仕版

朱之元字乾大號易亭社山人以弱冠中康熙乙酉鄉榜雍正二年分發西川委署潼川之遂寧遂為僻壤養備而教未興元捐俸設義學拔其姿之殊尤者十人延師

訓迪公餘身親講課文風以是駸駸日上會學使者案臨潼郡試遂日大為賞識所拔之士十不遺一無不服其藻鑑之精遂邑例有監課累民病商元毅然稟請大憲革除以親老力辭歸後奉

詔凡在籍人員赴部觀政以次銓選籤掣山東平原

引見調舞邑隨即於履歷摺內備陳親老終鮮兄弟乃聽終養年九十有四寧靜自愛足跡不入城市家居惟以讀書立品為兒曹勗乾隆庚午纂修邑乘當事廉其賢且能曾三應鄉飲大賓之選

吳易峯字方泰號怡亭龍山人弱冠舉於鄉為文洋洋灑灑輒數千言初以明通除興安學博尋棟安徽歷署州

縣所至有聲最後補太湖時湖邑苦河患峯相度機宜督夫疏築是謂西河西河更闢熙湖書院捐置田畝公暇即與諸生校程居官崇簡易入無羅綺之飾出鮮輿從之紛嘗於廳事額曰民近益取民可近亦寓平易近民之志也聽獄務以德感兩造脩必平心鞠勘無情者不得盡其辭至有自耻終其訟者官皖十餘年凡設施古循吏莫以過秩滿奉

旨以同知用卒於京湖人立祠祀之

朱必塲字冠干焜之子文端公從子也幼穎異長而積學雍正癸卯領鄉薦授安徽潛山令潔己愛民撫字有法作興潛嶽書院捐給膏火造就多士潛人今尸祝焉

熊定猷字黼臣號筠溪懋瑚之孫由拔貢生正白旗官學  
教習任福建閩縣知縣以經術歸吏治處繁劇恒若無  
事桂林陳相國撫閩時稱廉能第一遇疑獄輒取決焉  
嘗署長泰寧洋平和漳浦同安諸縣所至有聲歸田後  
課子姪並成名兄弟五人怡然白首後嗣昌熾為邑甲  
族云南城仁濟坊人

吳躍龍字雲津號霖川龍山人年少成進士事父母孝養  
備至初籤發四川署彭水其地雜苗徭舊俗有蓄婢不  
為婚配婚配不待媒妁等弊躍龍下車首懲之併作歌  
以勸繼署蓬溪蓬溪咽匪嘯藏夙稱難治偵獲頭目一  
人置之法餘俱逃遁 制府策公楞因以第一能員

題補名山未幾以內艱去服闋補湖北嘉魚前後三年  
尊賢禮士鋤莠安良絕包苴廣愷悌舉非俗吏所為旋  
調江陵陵名甲楚北當七省要衝案之積若山躍披閱  
數晝夜留牘悉清邑有神君之頌視名山嘉魚等縣烹  
小鮮耳特以奸誣被劾中濕而殂才不竟用惜哉

徐尚孝字行先號竭齋幼穎慧弱冠補弟子員以雍正乙  
卯拔貢考授內廷教習分發山東任沂水縣丞旋調長  
山歷署清平城武蘭山淄川諸縣後擢郟城令解任年  
餘復補聊城越四年丁內艱服闋隨補江蘓興化縣令  
服官四十年廉靜寡欲一以愛民養士為心年六十三  
卒於官署其子為邑增生

恩

吳廷試字壽臣號介堂黃筮人孝友性成淹貫群書弱冠補博士弟子員丙辰領

科鄉薦壬戌科中明通榜秉鐸西昌訓士有方多發名成業之士既而授直隸州鄜州司馬旋署本州州牧禮士愛民有利必舉無弊不除蒞任未及三年以疾卒于官署鄙人為之出涕曰古之遺愛也

劉發純字爾厚號立峯一都西村人少穎異年十四補博士弟子員由拔貢生考取教習授弋陽縣教諭辛酉領鄉薦補任靖安教諭所至訓飭士子以立品為上文次之凡遊其門者咸爭自濯磨士風丕振後其子署弋陽司訓晉謁者猶嘖嘖述其教澤云

楊志僑字惠人號立亭進士蘓臣幼子生而穎異為文奇警補弟子員旋食餼雍正乙卯拔貢克正白旗覺羅教習期滿授湖口縣教諭加意作人一時門下士盡屬桃李如曹公步廷司鐸於此猶仰彼遺風焉卒年七十有五其子亦登黌序

吳大生字履祥號健齋學山長子也邑廩生有聲庠序由歲貢授直隸廣宗令以廉能詳慎稱在任八月辦理進勦金川兵差糧餉悉中調畫

翠華南幸隨

鑾辦差不累於民前後議叙以外艱歸起補陝西延川縣延川古白翟國新經旱災人民凋喪井里荒虛大生加意

撫綏廣為招集始有起色俸滿以同知用借補鳳翔府  
通判蓋蘓文忠舊治也崑管水利監捕政閔事簡大生  
先後督修靖邊城垣辦理兵差糧餉軍裝騾馬及凱旋  
事宜議叙軍功中間署西安同知篆俱以辦差故帶印  
辦事刻無寧晷後內艱補雲南同知兼攝呈貢事以疾  
卒于官

吳霽字子卿號瑞屏龍山人性質直廉謹人有美則樂成  
之遇事輒能任為文峭折古奧常自叙得力燕北之遊  
中乙榜霽次司廣昌鐸教人先行後文貧者每益之資  
凡月課必集鄉城生監會明倫堂扁門角執日再具盤  
殮納卷後復肆筵與諸生論說極歡而罷銜定名諸生

當面批示優者給紙筆費有差司訓亦倣之輪次遂著  
為例先又廣邑齋署傾圮來官者僅堂右翼屋三間為  
棲止計然亦苦無門垣霽捐俸倡修簽老成者董其事  
規模廓然後數年以老告休門人難計留因建祿位謀  
俎豆馬霽退居十年餘每過親友雖遠必步行校讐之  
事窮日夜力不知倦燈下常作蠅頭小楷壽躋八十五  
無疾而終著有貢雲編傳經堂稿

徐尚義字耕次號質庵爾昌三子幼勤學長入庠補增丙  
子貢成均遵例捐縣丞分發雲南借補永北廳經歷在  
任五年政報懋著吏畏民懷壬午丁母艱服闋補授河  
南衛輝府經歷潔已奉公辦事勤敏上憲嘉之委署淇

縣更恢恢有餘歷任四載以疾卒於任士民感悼年六十有七

吳基龍字開先又字荀伯號樸齋龍山人少聰穎弱冠補弟子員由拔貢考補

內廷教習中北關副車任貴州安南令歷署普安荔波令平遠州牧護理大定府印務凡所至設學校明賞罰勸農課士諸善政不可枚舉以故苗民感格俱稱為名杜云至潛心經史雖老未嘗一日釋卷其文雅正清真詩亦雄健一時名下士多出其門刻有易山試菽看花詩行世生平重然諾好施與不事產業有勸之營者答曰積粟不如積書祿廩雖薄在我則有餘田地何所取乎甲

辰致仕兩袖風清弄孫課子樂道安貧壽七十三卒

熊中砥字東川號近亭定猷之子由郡廩中乾隆乙酉亞元丙戌進士為文雄深雅健成一家言知山西陵川縣與民休息不事紛擾丙午戊申兩校晉闈時稱得人性仁厚推誠待人親串僚友中貧乏者輒傾囊相助在任十三年卒于官行李蕭然士民歌誦馬仁濟坊人

歐陽嶙字繡峯號雲莊碧落巷人家世業儒以邑庠中乾隆丙子科鄉榜丙戌揀發廣東初試博羅潔己奉公治獄平允上憲並嘉與之即委任瓊山崖州諸缺剖決如流人頌神明後補授會同令卓卓有政毅將膺保薦計典適以父憂去服闋赴部候補卒於京

况禹謨字敷五二十二都高沙人由貢捐授雲南白石井  
鹽課大使調劑得宜民甚便之歷署府經縣丞護理白  
鹽井提舉皆清勤有報調補麗江井繁缺值緬匪不軌  
委辦戎事不辭勞瘁卒于虎踞關上憲憐而奏之蒙

恩馳驛歸葬

胡詒聖字訪周號谷齋一都瀘溪人以名孝廉初為泰和  
學博造士有方深得蕪湖遺範後選授山東陽信令未  
抵任奉委署武定海防分府聖加意巡防俾民安堵大  
有循報迨蒞陽信視民如子而於漕務尤著善政陽之  
漕數累萬向苦收兌擁躋守候需時聖乃分別都里按  
日為次曉示先期遂有隨到隨收之便其於此微短欠

概從減抹不復取盈是能普美利于不言者惜在任未  
久而以疾卒歸櫬之日民懷其德號泣而送之且將立  
祠祀焉

徐尚文字郁周號樸齋南城仁濟坊人少隨兄任於閩魯  
等處即能嫻熟吏治及遵例銓浙江縣丞各憲以才力  
兼優歷署繁縣屢任大差無暇歸原缺者十餘年賢勞  
素著乃以卓異離浙陞授廣東昌化縣知縣兼署龍川  
因理繁治劇過勞受病乃卒上憲深悼嘆之

傅遵業字循先號繼庵祖國植父四美俱見敦行業年二  
十貢太學考授州吏目乾隆二十七年分發廣東借補  
楊山縣淇潭司月餘調連之星子舊有常平倉穀至是

虧欠者多遵業廉知其為書吏侵漁勒令彌補一時莫不稱快其他事類如是焉任滿調南澳南澳潮州之負山濱海者其盤詰控御較星子尤難遵業經理悉當蒞任之明年獲巨盜二十餘人訊鞫明允上憲方以卓異待陞尋抱病卒于署位雖卑所至皆有報潮州府倅張公嘗為之傳焉

徐承真字棠伯號懋亭尚忠長子天性惇謹潛心文藝補博士弟子員十餘年以優行貢成均就教諭職後遵例加捐監場大使不發浙江補授鳴鶴場大使在任六載凡商民有爭訟罔不立判清廉正直上憲咸珍重之旋丁內艱歸里以疾卒其年五十有六

賈飛鵬字九萬南鄉畬山人乾隆二十年由監生援例任亳州義門巡檢居官勤慎不擾民以自奉在職二載布衣蔬食無異寒士恪修其職士民稱之引疾歸卒

朱必考字最程曠之子文端公從子也雍正癸卯舉於鄉授福建安溪令潔已奉公苞苴不入整風剔弊吏懾民安以宦情恬退告歸民甚懷之甲戌與修邑乘未竟而卒

朱必坊字衛道炯之子文端公從子也弱冠獲雋於鄉授雲南定遠令賦性清剛忠信明決片言折獄吏民無敢欺者尤精於繪事尺幅至今寶之

朱必墩字仁安文端公姪炯仲子也以髫年舉於鄉任旌

德縣令明巡按御史朱實昌曾宰是邑即其支祖也墩  
惟率祖攸行愛士恤民教養有法殆數典不忘者歟  
朱必璵字直之炯三子由例監選授山東壽光丞以卓茂  
遷商河令庭無留訟民咸德之

朱洛臣字禹書坡山人自幼甘貧力學乾隆辛酉選貢  
朝考取列優等領景山教習期滿以知縣用授靖江令歷任  
興化鹽城諸邑愛民潔己所至有聲卒於鹽城官署邑  
人思慕不忘

朱紹功字德求侍講學士璫長子乾隆丙辰舉於鄉任江  
蘓安東令愛民如子廉介自持復任廣東澄邁四會署  
糧廳所至皆有聲尋以懦弱請改教職選金谿諭訓士

惟敦實行不徒以文藻相尚秉鐸數載歸而卒於家

朱禮陶字醇儒號靜菴坡山人人才識超羣遵例議叙知縣  
籤掣山西壺關令政簡刑清尋以內艱去服闋補授河  
南南召調武陟兼攝孟鞏二縣所至有聲以卓荐陞無  
為州牧尋陞福建泉州府知府整飭吏治加意人文士  
民悅服後以喪子抱慟告致歸里去之日琴鶴蕭然  
徐業字繼可號克亭筠南石橋人秉資穎異幼依 大翁

竹岩先生膝下授以經書耳聆心得學有淵源嗣由明  
經司泰和鐸樂育慇拳間分微俸以資貧乏其時如姚  
雪門先生輩深荷栽培至今德之厥後兩次服闋補任  
初為新建司訓兼篆南昌學化雨春風雅擅蘓湖之號

高安縣志 卷十三  
三  
繼補上饒其學素少郡庠自公教澤宏敷文風丕振每歲科試所得郡庠遂不減他邑旋以俸深陞南昌學諭饒邑諸生祖饒于道幾連十里蓋重感其嘉會學校之功也及抵南邑駕輕就熟舉學中之文行卓著者悉報以優是科優選南邑邀大半焉文宗亦重嘉之計秉鐸三十年分訓十餘學年逾古稀而致仕其文章經術遍聞江右矣為約舉之以志其槩

朱德輔字先立號彞菴一都清湖人幼習舉業屢試未售循例捐納從九選授廣東茂名縣平山司巡檢潔清自守其地有蘿蔔橋一座道當通衢因遠年傾圮往來病涉遂捐俸修葺經兩載而橋成人皆德之厥後督理填

鉤路受烟瘴回署患病蒙 上憲委管粵海關高州總口稅務自揣不能痊愈乃告病而歸宦橐蕭然平山士民立有棠蔭匾額其生平概可想見矣

朱芳臣字子搢號三省岷人積學嗜古立品端方由邑舉而食餼乾隆丁卯科獲雋於鄉揀發授安義教諭謀士有方行先文後士習于以蒸蒸日上四十五年奉部載取選授甘肅鞏昌府漳縣令甫下車潔已奉公愛民如子發奸摘伏人稱神明猶竊竊以素餐為慚籲請改教復補贛州龍南教諭尋亦歸里適本邑纂修志乘與有勞焉將竟而徂年八十有五注有四書便解待梓

